



貴州文庫編輯出版委員會

〔民國〕  
興仁縣補志

第二冊

葛天乙等  
霍錄勤等  
纂修

一九六六年貴州省圖書館複製油印本

 貴州出版集團  
貴州人民出版社

興仁縣補志

人物志

蓮出污泥芝生腐壤雋特之士原非地所能限而風礪  
濯磨以底於成則政教之鑄造環境之涵濡胥有繫焉  
縣境自明建衛所清置流官中州人士踪跡戾止制科  
取士俊乂輩出卉服鳥言之鄉一躍而章甫說禮濟濟  
配南離文明之象矣其間健順異資夷險殊遇或懷瑾  
握瑜抱道自重或正身率屬遺澤在人或執戈衛國見  
危授命皆古所謂鄉先生歿而可祀於社者也即曲學  
方技才分不同精於其道斐然成章要皆乘時以自見

身个景補  
詎可任其湮沒耶地道無成恒德終吉矢節全貞時榮  
綽楔王者教孝教忠於茲有微權焉今以鄉宦氏族德  
行忠義儒林列女著於編見府志者不錄嫌掠美也鄉  
宦首陳忠尊譜牒也材重史實義守謹嚴覓片羽於劫  
灰搜明珠於滄海抱殘守闕有志未逮攻瑕苴漏敬俟  
來哲

興仁縣補志卷七

人物志 列傳一

鄉宦

陳忠

李世名

白天鑒

周士藻

慎機燦奎燦文

陳占書

明順清

李同梅

楊時昌附

蕭連城

連陞連斗附

譚元輔

龍雲階

陳忠

新城所人有膽畧初以軍功管本所操印按舊

志稿有管本所操印數字宜為陳氏譜牒原文今仍之

永樂中官新添衛指揮

同知叛苗攻城忠堅守擊卻之後改官普定衛指揮

興義  
府志

李世名 土井巷人幼讀書弱冠嫻弓馬擊刺諸技投  
効行間乾隆中從征楚亂曾手殲悍酋得獎六品功  
牌六十年隨大軍進剿鎮筸叛苗次永綏深宵被襲  
營壘幾潰世名扼險死拒賊不能前退去大軍獲全  
以功保千總嘉慶初調征四川妖匪事平補古州衛  
千總卒於官

白天鑒 姑屯人其始祖於明洪武中隨軍南征官百  
戶屯新城所後移居姑屯先世以行伍起家至天鑒  
折節讀書兩應童子試不售棄文就武富膂力善射

中嘉慶丙子貴州武闈道光癸未殿試二等待衛回籍投効安義鎮標以征苗功賜孔雀翎補銅仁都司黎平營守備咸豐三年調征髮匪次景德鎮營陷戰歿事聞予雲騎尉世職三世以後永襲恩騎尉

周士藻 字袞章邢家巷人雍正己酉科拔貢朝考報罷考取咸安官學教習積資授廣東潮州府普寧知縣丁巳到官普寧本瀕海區民習黠詐多不安分兼之商務殷繁龍蛇溷雜士藻待民以誠寬猛相濟閭閻乂安越三年卒於官其子慎機扶櫬歸葬坡寨慎機性醇平有文名乾隆癸卯恩貢生孫燦奎乾隆丁

酉科拔貢同年舉於鄉屢絀春官丙午大挑二等補  
印江教諭印江縣志作訓導燦文以普安縣學歲貢生選授  
松桃廳訓導均以文行著能世其家燦奎於嘉慶初  
佐勒保討平南籠仲苗亟請移還縣治資鎮攝士論  
尤多之云

陳占書 字酉山家安逸里同治己巳科舉人辛未試  
春官不第歸里回亂初平佐長吏辦善後乃清釐田  
賦剔除中飽撫綏回苗安集流亡鄉里咸受其福事  
竣議叙以知縣分省儘先補用光緒己卯引見籤分  
廣西歷署博白河池思恩北流各州縣所至有聲初

補修文縣旒改宣化縣宣化附近南寧綰轂粵西治  
理繁劇到官值甲申法越之役驛遞運輸軍務殷屨  
胥恃其部署事理而民不擾隨調補蒼梧縣事蒼梧  
又適與外人約開商埠地據珠江上游為粵省東西  
門戶交涉事多差務繁重游匪又常出沒卒能一一  
應付水到渠注境圍安堵以老告歸卒年七十四

明順清 字月朗北大街人嘉慶中以歲貢生官平越  
直隸州學正升都勻府教授在任獎藉人文以敦品  
力行為務喜表彰潛德嘗謀府詳請彙旌孝友貞節  
又請如朱文公故事建邑中社倉大著成效番款之

歲存活甚衆故事諸生初謁學官均備贄儀學官視其貧富以定多寡順清以錙銖爭議有類市儈深失國家興學作人至意乃勸邑富室醵資購產計三年租益可抵歲科試新生所納印贄儀之數納之學官事成將產券繕冊申府通詳註檔定案於是寒畯之士深受其惠晚年艱似續告歸卒於家

李同梅 字雪樵土井巷人咸豐末以歲貢生選授天柱教諭時新城回警見告挈家之任下游苗匪亦迭起不以冷曹自嫌諄諄以人心風俗關係學官雖秩卑俸薄職固綦重訓導不稍怠同治初學使黎培敬

按試來黔先稽各學官職守有有學無官者有有學  
官而避居境外有有學官在而隱農商以自晦者得  
同梅勤劬狀大喜令隨棚襄辦試事按臨各府遇缺  
即札充該屬學官試竣奏保五品銜授江西廬陵知  
縣未赴任卒同時有楊時昌楊泗屯人道光乙酉拔  
貢生官餘慶教諭同治戊辰擢河南固始知縣未引  
見卒省寓

蕭連城 字和廷咸豐初諸生時中原雲擾黔中亦烽  
烟不靖苗回滋擾乃奮起從戎隨丁寶楨剿辦下游  
苗匪奉委入川受知川督駱秉章飭領軍征石達開

五

累功以知州留川補用游升知府賞戴花翎同治十年引見以原官回川候補報捐三品頂戴光緒初丁寶禎督川以舊部得倚任幫辦鹽務嗣以緝獲巨匪布政使嵩藩嘉其績委署青神昭化各縣事總辦中壩鹽釐稱治丁亥補廣安知州戊子之官州故多盜恒微服至鄉偵盜藪盜皆颺去平昔虛心訪治鞠囚決獄多所平反無枉縱民俗丕變廣安為古賓地人文藉甚第課額多而膏火尠乃捐廉俸別置書院嘉惠士林故事州牧詣鄉勘驗取給屠捐歲約四五千金而勘驗又由鄉供應其費連城惡其煩索悉罷并

移局支勘驗費作書院膏火提公產息以益之不敷  
由官籌給定勘驗必需之費具詳立案在官俸給所  
餘嘗寄籍建宗祠葺寺觀俛助鄉里各善舉遷雲南  
候補道過自流井以官餘營鹽業尋卒年七十五子  
詩庭扶櫬歸葬城東鐵廠河吏部侍郎黃杰為文表  
其墓從弟連陞以行伍起家投効達字營從征新城  
叛回屢立戰功統領鍾開蘭保升守備歸安義鎮標  
効力亂平補排杉汛千總兩次入都引見升實缺守  
備未補官而卒弟連斗字星垣同治壬申中貴州鄉  
試武舉丁寶楨督川時委解運餉鉛積功以游擊叙

興仁縣補志  
卷五  
用賜花翎光緒中委戍粵邊罹瘴卒

譚元輔

一名五受字贊堦巴林大堡塘人父士爵普

安廳學廩生好施濟有善人之目元輔年十二回變  
距新城石達開部曲馮丞相過盤江縱兵焚掠家被  
燬其父死於兵家人竄散與其姊避新城止於城外  
空舍回帥馬河圖夜巡野馬驚逸搜獲之問姓氏侃  
侃應答無稚習河圖器之攜歸另舍居其姊義子之  
派為廝馬官蓋監督養馬者未半年食空浮支之弊  
除馬皆茁壯因加親信暇令究心武事會攻安南久  
不下河圖親與督師因獻策取道叢箐峻嶺中逾海

馬磻襲城身先士卒城果破命為安南元帥回衆自  
是知其名林子清者驚悍善戰時無與敵官至雲南  
提督書蓋世英雄四字於幟張於馬前奉命平新城  
回入盤江所向克捷進營交那有滅此朝食之概馬  
忠回中健將盤江各縣皆為所破以趙德昌軍之謀  
三多負長勝名猶不能敵與子清遇狼狽敗走回用  
憂懼不知所措有議納款者時元輔方率衆渡江攻  
郎岱河圖飛書調回語衆曰如五受而敗降未晚也  
衆腹笑之元輔與陣子清覷其短小似十餘齡童子  
易視之交綏殊不敵恚甚曰我去矣不與汝輩事躍

下裂其幟引還李蕃浦作詩紀之有句云梨花飛舞  
電光閃從此爭呼王鐵鎗蓋紀實也貴州巡撫曾璧  
光請旨用兵詔以湘滇黔各省兵會盤江統領何世  
華先濟安南鐵索橋元輔與戰何敗北退營永寧州  
新堡次日單騎詣營納款何喜甚命暫署安南都司  
倚為前鋒乃更以書勸貞豐楊九及田泰祥降連破  
安姑下山高武海河塘諸要隘新城回帥張定中聞  
訊大驚失色語其屬曰五受叛變不特大勢去吾曹  
其免於羶墨乎事平以副將補平越游擊光緒初臺  
灣生番戕日人稱亂朝命黔撫岑毓英為閩浙總督

以圖之以元輔從積功封武功將軍回黔委長壩營

練軍管帶駐防新城年五十八寢疾卒於家節舊志按

原稿有保提督引見授福建提督以艱似續不欲遠離鄉里未任云云岑襄勤奏稿均不載奏調官軍亦

不及平越營特刪去

龍雲階 以字行初名步衢其先世襲計營土守備別

具土官傳生而岐嶷讀書不求甚解惟摘英擷華類

能得其神髓年十七間闕出遊足跡遍大江南北過

粵投龍濟光部充各級尉官龍氏罷去展轉粵中各

軍師北伐軍興升營長轉戰湘贛所至有功洎克武

漢圍長忌其才時思中傷憤然引去十八年己巳任